

Date – 22/06/2025

Time - 18:30 Hrs

HEADLINES (EVENING)

1. Mizorama Myanmar raltlan 32,000 chuangte mitnaute leh kutze thla lak hna tan thei turin ruahmanna peih fel thaw khat a ni tawh.
2. Ram chhung hmun dangah leh hmar chhak state thenkhatah Covid -19 a tam chhoh viau tawh lai-in Mizoramah chuan kuminah 2 chauh hri kai an la awm.
3. Prime Minister Narendra Modi kaihhruai sorkar kum 11 chhunga hmalakna hrang hrang zingah Mizoramah pawh khualzin hip kawngah ruahmanna engemaw zat siam mek a ni.
4. Iran leh Israel inbeihna nasa chho zel chungchangah Prime Minister Narendra Modi-an Iran President Masoud Pezeshkian-a a bia.

<><><>

BIOMETRIC ENROLLMENT

Mizorama Myanmar raltlan 32,000 chuangte mitnaute leh kutze thlalak hna tan thei turin ruahmanna peih fel thaw khat a ni tawh. Home department hotute sawi danin nimin piaah Zirtawpni khan National Informatics Centre (NIC) mi thiamte chuan Myanmar mite chhinchhiahna tur atan hian biometric enrollment chungchangah Mizoram district hrang hranga he hna thawktu tur official-te training an pe a. Hei hi a taka biometric data khawn khawma online biometric enrollment portal hman zirna a nih rualin he hna atana inpuahchahna pawimawh a ni a. Hetih lai hian chuang hmanraw lei belh leh ruahmanna kimchang siam, la hmabak a nih avangin tun mai-ah rum rum chuan hna hi tan theih a la ni dawn lo ani. Ministry of Home Affairs (MHA) thuneitute leh Mizoram home department hotute hian hemi chungchang hi biakhmuhtheih kaltlangin May ni 16 khan an lo sawi fel tawh a. A hnu thla khat ral vela NIC mithiamte'n biometric enrollment portal an siam fel takah chuan Myanmar raltlante mitnaute leh kutze thla la a chhinchhiahna tur hi a taka kalpui theih a ni ta a ni.

Sorkar hmasa hun lai atang khan biometric data lakkhawm hi kalpui turin MHA chuan rawn hriattir tawh . Mahse, MNF sorkar khan kum 2023 chawhnu lama Assembly inthlan lo awm tur atan inbuatsaih a tul thu chhuanlam a hmangin an lo thulh tawh a. Hemi hnu pawh hian MHA-in enrollment portal atana form a rawn siam chu ramdangmi India rama dan kalha awm thawnkir turte tana siam a nih avangin Myanmar raltlante chhinchhiahna atan a hman theih loh avangin thawn kir leh a ni a. MHA hian form a rawn siamthat leh hnu-ah enrollment portal hi NIC-in a duang tan a, tun hnai khan a siam zo thei ta a ni.

Sorkarin a chhinchhiah dan chuan tun hnai a Myanmar raltlante an rama kir leh hmun danga kal an awm avangin Mizorama awm an tlem hret a. Tun dinhmuna Myanmar raltlan awm zat chu an vaiin mi 32,419 an ni . Champhai district-ah tam berin mi 13,586 an mikhual a. Lawngtlai district-in dawtin mi 6,017 an awm a, Siaha district-ah mi 5,036 an awm bawk a. Tun hnai a chhuak an awm nualna Aizawl district-ah mi 3,669 awmin an awm tlemna ber Kolasib district-ah mi 129 an awm mek a ni.

Myanmar a Chin state atanga raltlante hi sipai-in kum 2021 February ni 1 a Myanmar mipui sorkar paihthla a thuneihna an hnehchhuh hnu thla khat vel atangin Mizoramah an lo lut tan a. An tam lai ber chuan mi sing nga vel an tling hman a, an khua a ralmuan tak deuh hnu a kir leh bakah hmun danga kal darh an awm avangin an tlem hret hret a, a changin lo luh belh an awm ve reng bawk a, chuvangin Mizoramin raltlan a mikhual zat hi a danglam reng a ni.

Hetih lai hian Mizoram leh Myanmar inkar ramri hung chu dodalna karah central sorkarin a thulh tak thu hriat a la awm lova. Ramri hi hung a nih dawn pawhin a hma-in ramri-ah kawng sial chhuah tura ruahman a ni a, kawng siam hna thawktu tur Border Roads Organisation (BRO) thuneitute chuan kawng siam hna hian kum 5 tak chu a duh an rin thu an sawi a. Tun hnai a MHA official lo zinte hnenah Mizoram sorkar official-te chuan ramri hung chu a senso a hauhtak tur ngaihtuahin a tangkai vaka an rin loh thu an lo hrilh ni a thu dawn a ni.

<><><>

ELECTRIC BILL

Power & electricity department hotute chuan electric bill pung anga lang chu pawl an tih thu leh fel tawh lo a awm chuan tha taka lo dawngsawng tura hmalak a nih thu an sawi.

P&E Department hotute chuan tun hnaia Electric bill chhut dan thar hman a nih avanga harsatna thleng mek chungchang-ah tuna electric bill chhutna khawh billing software an hman mek SAP chu a hlui deuh tawh a, information duh ang a pek theih tawh loh bakah sorkar laipuiin Revamped Distribution Sector Scheme (RDSS) a kalpui hnuaiah software thar tha zawh mupui te mamawh information pe thei leh hman awlsam tur a siam a ni an ti a. Hemi hmang tur hian hmalak mek a ni a, tuna an khawh hman lai atanga khawh thar a consumer data insuanchhuah chhung a rei deuh avangin consumer meter reading a hun takah lak theih a nih loh avangin electric bill pung ta anga lang chu pawl an tih thu an sawi a. Mipui-in bill dik tak an chawh theih nan pro data hmanga bill hun dik tak siamrem a ni a, hetih rual hian an hmanrua te chu khawh thil a nih avangin chhan engemaw vanga thil fel tawh lo a lo awm a avanga mipui atanga complain a awm a nih chuan tha taka lo dawngsawnga hmalak nghal zel an tum thu an sawi. Harsatna neite tan billing application atana hman PEDM Consumer App atangin mahni in lum atanga complain thelulh mai theih a nih thu an sawi bawh.

P&E Department hotute chuan an Department chu Corporation-ah leh turin hma lak mek a nih thu pawh sawiin, a bul tan na'n P&E Department chu Strategic Business Unit (SBU) pathum; Generation SBU, Transmission SBU leh Distribution SBU-a then phawt tura hmalak mek a nih thu an sawi a ni.

<><><>

COVID

Ram chhung hmun dangah leh hmar chhak state thenkhatah Covid-19 hri kai a tam chhoh viau tawh lai-in Mizoramah chuan kuminah 2 chauh hri kai an la awm.

Thenawm Manipur state-ah January thla atanga vawiin thleng khan Covid hri kai 98 an awm tawh lai-in Mizoramah chuan kuminah 2 chauh kai thar an la awm a. He'ng mi 2-te hi Aizawl district a cheng an ni a, Zoram Medical College & Hospital-a enkawl an nih hnu-ah June ni 5 khan dam takin damdawi-in an chhuahsan leh tawh a ni. Heti chung hian Integrated Disease Surveillance Programme (IDSP) hnathawkte chuan Covid dinhmun hi chik taka an ngaihven reng thu leh central sorkara Ministry of Health & Family Welfare thuneitute nen an inbiak pawh reng thu an sawi a. A tul dan a zira Mizoram pawn atanga lo lutte lo endik pawh kalpui thei turin ruahmanna siam turin an inpeh reng niin an sawi a ni.

<><><>

CATERPILLAR OUTBREAK

Khawzawl district chhung khaw 3-a hnahkhawr pangang puang chu rannung thahna hlo hmanga tihrem tum mek a ni a, buh hmunah chhiatna a thlen vak an rin loh thu agriculture mithiamte'n an sawi.

Khawzawl Dsitrict huamchhung khaw pathum - Vangtlang, Chalrang leh New Chalrang khuate'n lo an neihna a Buh eichhetu tunlaia hnahkhawr pangang puang mek ni a sawi chu nimin khan Khawzawl District Agriculture Office atangin ADAO Pu Lalrammuana hovin Agriculture mithiam 3 in lovah kalchilhin an enfiah a. Chalrang leh New Chalrang khua te hian lo atan hmun khatah ram thehin chhungkaw 210 lo-ah Hnahkhawr Pangang hi hmuh tur a awm a, heng zinga chhungkaw 70 thlawhhma-ah hian a puang nasa a zual a. Vangtlang khuaah hian chhungkaw 80 thlawhhma-ah Hnahkhawr Pangang hi hmuh tur awmin chhungkaw 10 thlawhhma-ah a puang nasa zual a ni. Neihdawn leh Khawzawl mite thlawhhma-ah pangang hian vaimim kung a awm chilhna tlem a zawng a awm niin an sawi bawh.

Agriculture mithiamte'n an endiknaah hian loneitute hnenah damdawi semin damdawi hman dan inzirtirna an nei nghal a. Chalrang VCP Pu C. Chawngliana chuan an harsatna tawh te hria a, Agriculture Department in hma an laksak nghal chu lawmawm a tih thu sawiin hei hian hnahkhawr pangangin buh a ei chhiat tur pawh nasa takin a ven hman an beisei tih a sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

11 YEARS OF PM MODI’S GOVT. (TOURISM)

Prime Minister Narendra Modi kaihhruai sorkar kum 11 chhunga hmalakna hrang hrang zingah Mizoramah pawh khualzin hip kawngah ruahmanna engemaw zat siam mek a ni.

Tourism director Pi R. Lalrodingi’n Akashvani Aizawl a hrilh danin Prime Minister Narendra Modi kaihhruai NDA sorkar hian Swadesh Darshan 2.0 hnuaiah Champhai a Keilungliah tuikhuah cheina atan leh Champhai district-ah tho Heritage & Cultural Centre dinna atan cheng vaibelchhe 80 chuang a rawn pe a. Hei hi tangkai taka hman tura ruahman a ni. Central sorkar chuan hman lai pi leh pute hunlaia lung a milem ziah tam tak awmna Vangchhia khua a Kawtchhuah ropui mi tam takin an tlawh thin chu a tlawhtute tana remchang leh awlsamna tur (public amenities) siamna atan cheng vaibelchhe 5 leh nuai 2 a rawn pe bawk niin a sawi bawk.

Tourism director chuan MLA 40-te chu an bial chhunga khaw 1 theuh enkawl bik tur thlang (adopt) tura tih an nih thu a sawi a. ZPM sorkar flagship programme ‘Bana-kaih’ sum hmangin he’ng khuate hi chei tur a ni a ti a, an khaw thlante mamawh ang hi Tourism department chuan a zir chiang mek zel a, an zir chianna behchhanin ruahmanna an siam dawn niin a sawi a ni.

<><><>

PM SPEAKS WITH IRAN PRESIDENT

Iran leh Israel inbeihna nasa chho zel chungchangah Prime Minister Narendra Modi-an Iran President Masoud Pezeshkian-a bia-in Israel nena an inkar boruak so sang chho zel chu pawl a tih thu a hrilh a. Pu Modi-a’n social media-a a tarlan danin Iran President nen hian Israel leh Iran inkar chungchang, chipchiar takin an sawi dun a, inbeihna chu tih tawp vat tul a tih thute, inbiakna hmang chauha remna leh muanna neih leh theih a nih thute a tarlang bawk.

<><><>

IRAN CONDEMNS US ATTACK

Iran chuan sipai chakna hmanga US-in an ramchhunga nuclear hmunte a bei chu na taka demin US chet dan chu khawvel Dan leh United Nations Charter palzutna a ni, a ti. US-in a beih hnua thuchhuah a siamah Iran chuan US chu Israel thurualpuiah a puh a, International Atomic Energy Agency (IAEA) hriatpuinaa ralthuam siamna pawh nilo nuclear hmunte beiah a puh bawk.

US chet dan chungchangah hian Iran chuan United Nations Security Council leh IAEA-te chu hma la vat tur leh UN thutkhawm hmanhmawh ko turin a ngen a, IAEA chu tan bik neiah a puh bawk a ni.

<><><>

MIDDLE EAST CRISIS

Hetih lai hian, Iran chuan Israel lakah True Promise 3 beihpui thlak lehin tukin khan Israel lamah missile tam tak, a kap lut leh a, Ben Gurion tumhmun leh sipai hmun pawimawhte an bitum a ni. Islamic Revolutionary Guard Corps chuan hei hi US leh Israel beihna chhan letna a ni tih a sawi. Iran-in missile-a a beihnaah hian Haifa-ah mi 23-in hlial an tuar a, Karmiel-ah hmeichhe pakhat lungphu chawl-in a thih phah bawk.

<><><>